

Uunga siunnersuut: Ilanniartut ineqarfii pillugit Namminersorlutik Oqartussat inatsisaat nr. xx, xx. xxx 2019-imeersoq

(Ilanniartitaanermut, Kultureqarnermut, Ilageeqarnermut Nunanullu Allanut Naalakkersuisoq)

Saqqummiussissut**Siullermeerneqarnera**

Siunnersuut ataatsimut isigalugu isigineqassaaq, Kalaallit Nunaanni ilanniartunut inissiaqarnerup pingauteqarluinnarnera piginnaasaqalersitsisumik ilinniarnissamut periarfissaqalernermut, inummut ataasiakkakamut, inuaqatigiinnullu ataatsimut iluaqutaasussatut.

Ilanniagaq pitsaasoq suliffeqalernissamut inuaqatigiinnilu peqataanermut aqutissiuussisussaq innuttaasunut namminernut ataasiakkaanut inuaqatigiinnullu pitsaasumik qularnaveeqqusiusarpoq, atugarissaarnermut toqqisisimanermullu.

Ilanniartitaaneq, suliffeqarneq aamma aningaasat isertitat aalajangiisuusumik inuaqatigiinni atugarissaartuni inissismapput, ilutigisaanillu ilanniagaqarneq inuttut inuaqatigiit avataanni inissimalernissamut annikinnerulersitsisarluni, taamalu aamma isumaginninnikkut ikorsiissutit annertusiartornissaasa pinngitsoornissaanut. Inuaqatigiillu tamatumunnga atatillugu inuit ilanniagaqarnissaannik soqutigisaqannangillat, kisiannili ilutigisaanik pingauteqartumik ingerlatsisutut inissismallutik, aaqqissuussinermi, neqerooruteqartarnermi aqtsinermilu suliassaqarfimmi tassani, taamalu nunami nunatsitut ittumi inuaqatigiit siamasissumik najugaqarfigisaani aamma ilanniartunut inissiaqarneq ilaasariaqarluni.

Pingaarnertullu siunnersuummi anguniagaavoq, sukkulluunniit ilanniartunut inaateqarnerup sutigut tamatigut atorluarneqarnissaat, ilanniartunut inissaatikinnej pissutigalugu ilanniartut ilinniarfissaminnik taamaatiinnartannngissaat.

Ilanniartunut inissiat pioreersut iluaqutigineqarnerisa pitsaanerulersinnissaasa saniatigut siunnersuut aamma imaqarpoq ileqqussanik attartornermut akiliutissamik aalajangersasarnermik, ineqarnermut akiliutissamik aalajangiisarnerup aningaasartuutit piviusut tunngavigalugit naatsorsorneqartarnissaanik, tassanilu assersuutigalugu inoqutigiiit ataatsimut isertitaannik isiginiaalluni annertussusiliisarnermik. Tamatumanissaaq ilaavoq atuisut atukkaminnut suussusilersoneqartunut atuinerminnut akiliuteqartalernissaat, inissiat qanoq aserfallassimatiginerannik tunngavilimmik. Aaqqiissutissarli taanna tunngaveqassaaq immikkut iliuusaajumaartunik, manna siunnersuut aqqutiginagu aaqqissuunneqarumaartunik. Taamaattoq pingaartinneqarsimavoq Inatsisartut periusissat pingarnerit

aaqqissuussinerulerumaartumi isummerfigissagaat, taamaattumillu taakkua siunnersuummi ilaatinneqarput. Siunnersuullu aamma qularnaariniarpoq ineqarnermut akiliutip akilerneqartarnissaanik, akiitsqartoqalernissallu pinngitsoortittarnissaanik, aammalu allaffissornikkut sullissinerup naammassisaqarfiunerulernissaanik.

Kiisalu aamma siunnersuummi siunnerfiuvoq malittarisassat atuuttut malinnaatinneqarnissaat, ilinniartut ineqarfiiut tunngatillugu nalunaarummi maanna atuuttumiittut eqqarsaatigalugit.

Taamatut oqaaseqarluta siunnersuut Inatsisartuni inussiarnersumik suliassanngortippalut.